

BAJRAM-KRUNA MJESECA ZUL-HIDŽDŽETA

Hvala Allahu, Gospodaru svjetova, koji je robovima svojim upriličio raznovrsne sezone hajra kako bi u njima povećali svoja dobra djela i nadoknadili povremene nastupe ravnodušnosti i nemarnosti. Svjedočimo da je samo Allah Bog, Veličanstveni i Uzvišeni, Koji nema druga, i svjedočim da je Muhammed Njegov rob i Njegov poslanik, neka je salavat Allahov i selam neizmjerni na njega njegovu časnu porodicu i vrle ashabe.

Braćo i sestre u islamu!

Znajte da se nalazimo u značajnoj sezoni u kojima se dobra djela udvostručavaju, a loša opraštaju. Nalazimo se u mjesecu zul-hidždžetu u kojem je Allah, dž. š., sabrao toliko vrlina i upriličio toliko raznovrsnih ibadeta da mogu ostati nepoznanica samo onima koji su totalno nezainteresirani i ravnodušni. Tako je prvu blagoslovljenu desetinu ovoga mjeseca Allah, dž. š., pohvalio i uzdigao u samoj Njegovoj Knjizi, pa je, uzvišen neka je On, rekao: *"Tako mi zore, i deset noći..."* (El-Fedžr, 1-2).

Time se misli na deset prvih noći mjeseca zul-hidždžeta kojima se Allah zaklinje, ističući time njihov značaj i ukazujući na njihovu prednost. Buharija prenosi od Ibn-Abbasa, r. a., da je Vjerovjesnik, s.a.v.s. rekao: *"Nema dana u*

kojima je dobro djelo draže Allahu od ovih dana, - misleći na prvih deset dana zul-hidždžeta. "Allahov poslaniče", upitali su ashabi, "zar ni džihad na Allahovom putu"? "Ni džihad na Allahovom putu", odgovorio je on "izuzev čovjeka koji izađe u borbu sa imetkom svojim, a zatim se ni jedno ni drugo ne vrate."

Iz hadisa se razumije da je dobro djelo u ovih deset dana draže Allahu od dobrog djela u svim ostalim dunjalučkim danima, bez izuzetka, te da je efdalnije i od džihada na Allahovom putu, izuzev jedne posebne njegove vrste koja je bolja čak i od dobrog djela u tim danima. Nadalje, Allah, dž. š., propisao je Svojim robovima da poste te dane, izuzev desetog, odnosno prvog dana Kurban-bajrama, kao što je u tim danima također propisano što češće spominjanje Allaha (zikrullah), a osobito učenje tekbira (Allahu Ekber). Dakle, lijepo je (mustehab) da se u ovim blagoslovljenim danima što više spominje Uzvišeni Allah, i to izgovaranjem "tehlila" (La ilahe illellah, "tekbira" (Allahu Ekber), i "tahmida" (Elhamdulillah).

Vrijednost dana Arefata

Zatim, u ovoj blagoslovljenoj desetini nalazi se i dan Arefata, a on je bolji od svih ostalih dana. Ibn-Hibban bilježi u svome "Sahihu", prenoseći od Džabira, r.a., da je Vjerovjesnik, s. a. v. s., rekao: *"Najbolji od svih dana je dan Arefata."* Također, prenosi se da Allah, dž. š., postom toga dana oprašta grijehe prošle i tekuće godine, uz napomenu da se time

misli na manje grijehe. Tako Ebu-Katade, r. a., pripovijeda da je Allahov Poslanik, s. a. v. s., upitan o postu na dan Arefata, pa je odgovorio: *"Njime se oprašta prethodna i tekuća godina (tj. grijesi prethodne i tekuće godine)." (Muslim)* Stoga je mustehab, lijepo postiti na dan Arefata, izuzev onome ko je na hadžu, jer hadžija ne treba da posti taj dan kako bi bio sposobniji i jači za stajanje na arefatu i spominjanje Uzvišenog Allaha (zikrullah). Nadalje, dan Arefata je dan opraštanja grijeha, oslobađanja od džehennemske vatre i ponošenja sa prisutnima na njemu (tj. na brdu Arefat). Muslim u svom "Sahihu" prenosi od Aiše, r. a., da je Vjerovjesnik, s.a.v.s., rekao: *"Nema dana u kome Allah oslobodi više robova džehennemske vatre od dana Arefata. On se tada približi, a zatim se sa njima (prisutnima na brdu Arefat) pred melekima ponosi."*

Imam Malik prenosi u "Muvettau" da je Vjerovjesnik, s. a. v. s., kazao: *"Šejtan nije viđen ni u jednom danu sićušniji, poraženiji i zavidniji kao na dan Arefata, a to samo stoga što je u njemu svjedok spuštanja Allahove milosti i Allahovog opraštanja velikih grijeha."*

Tirmizija bilježi da je Allahov Poslanik, s. a. v. s., rekao: *"Najbolja dova jeste arefatska dova, a najbolje što sam izgovorio ja i poslanici prije mene je: La ilahe illellahu vahdehu la šerike lehu, lehul mulku ve lehul hamdu, ve huve 'ala kulli šej'in kadir - Nema drugog boga osim Allaha, Koji nema druga, Njemu pripada vlast i zahvala i On sve može."*

Kurban-Bajram

U ovom blagoslovljenom mjesecu se nalazi i Kurban-Bajram. Nakon stajanja na brdu Arefat i izvršavanja ovog najvećeg hadžskog rukna (uvjeta), te nakon sticanja oslobođanja od Vatre što se odnosi i na one koji su bili na hadžu i na one koji nisu, muslimani upotpunjavaju svoj hadž koji predstavlja peti temelj, odnosno stup islama. Stoga, dan koji slijedi iza dana Arefata predstavlja praznik za sve sljedbenike islama, jer svi su uzeli učešća u oslobođanju od Vatre, i u njemu im je propisano klanje kurbana. Iz zahvalnosti Allahu, dž.š., muslimani klanjaju Bajram-namaz, spominjajući i veličajući Allaha, dž.š.

Navešćemo vam neke radnje koje je pohvaljeno činiti prije klanjanja Bajram-namaza: provesti noć uoči Bajrama u ibadetu kroz sjećanje na Allaha, dž. š. (zikrullah), dobrovoljni namaz (nafila), učenje Kur'ana, traženje oprost za učinjene grijehe (istigfar) i upućivanje dova.

Allahov Poslanik, s.a.v.s, je rekao: *"Ko provede noć uoči klanjanja Bajram-namaza u ibadetu tražeći nagradu od Allaha, dž. š., njegovo srce neće umrijeti onoga dana (Kijametski dan), kada srca drugih ljudi budu umirala."* (Taberani, Darekutni)

Okupati se, namirisati i obući najljepše odijelo. Od unuka Allahova Poslanika, s. a. v. s., Hasan, r. a., se prenosi da je rekao: *"Naredio nam je Allahov Poslanik, s. a. v. s., da za Bajram obučemo najljepše odi-*

jelo, da se namirišemo najljepšim mirisom i da zakoljemo (kurban) najvrijednije što imamo." (El-Hakim)

Lijepo je za Kurbandski bajram ne jesti ništa dok se ne vrati sa Bajram-namaz. Lijepo je da se prvo jede kurbandsko meso.

Dani "tešrika"

U ovom blagoslovljenom mjesecu se, isto tako, nalaze i dani "tešrika", odnosno dani boravka na Mini, (a to su tri dana nakon Bajrama, ili 11., 12. i 13. dan zühidždžeta.). Muslim bilježi u svom "Sahihu" da je Vjerovjesnik, s. a. v. s., rekao: *"Dani su Mine dani jedenja, pijenja i zikrullaha (spominjanja Allaha)." To su "određeni dani" (el-ejjamulma'dudat) za koje Uzvišeni Allah u Kur'anu veli: "i spominjite Allaha u određenim danima."* (El-Bekara, 203) Time se misli na tri dana nakon prvog dana Kurban-Bajrama, a Allah je zapovijedio da se u njima čini zikr, s tim što zikrullaha u tim danima ima više vrsta: jedna od njih je spominjanje Uzvišenog i Svemogućeg Allaha učenjem tekbira neposredno poslije obavljanja farz-namaza, odmah nakon predavanja selama (ovaj tekbir se uči od sabaha dana Arefata, do ikindije četvrtog dana Bajrama).

Njegovo spominjanje učenjem bismille i donošenja tekbira prilikom klanja kurbana.

Ujedno napominjemo da je Allahov Poslanik, s. a. v. s., rekao: *"Najbolji posao koji čovjek može uraditi na Kurban-Bajram, a to je ujedno tada i najdraže djelo*

Allahu, jeste puštanje krvi svome kurbanu..." (Buhari i Muslim).

Vrijeme klanja kurbana je od prvog dana Bajrama, nakon klanjanja Bajram-namaza, do pred zalazak sunca trećeg dana Bajrama. Najbolje je po mogućnosti zaklati kurban odmah nakon klanjanja Bajram-namaza.

Sunnet je da se prilikom samog čina klanja prouči sljedeća dova: *"Bismillahi, vallahu ekber, Allahumme haza minke ve leke, Allahume tekabbel minni kema tekabbelte min Ibrahim halilike. (U ime Allaha, Allah je Najveći, Allahu moj ovo je od Tebe i za Tebe, Allahu moj primi od mene kao što si primio od Svoga prijatelja Ibrahima.)"*

I na kraju molimo Allaha, dž.š., da nam ukabuli naša dobra djela, da nam oprosti naše grijehe, uputi nas na pravi put i da nam podari da budemo zahvalni na Njegovim blagodatima AMIN!

Svim muslimanima i muslimankama čestitamo nastupajuće bajramske blagdane:

Bajram šerif mubarek olsun!

Tekabbellahu minna ve minkum!

**Udruženje građana
intelektualne omladine
"Selsebil" Živinice**